

## CHAPITRE LXXVIII:

*De N. Dame d'Emmy-Monts, & d'autres lieux, consacrez  
à la tres-sainte Vierge.*



**N**OSTRE Dame d'Emmy-Monts est à 3. lieües de la ville d'Abbeuille, ainsi appellée à cause qu'elle est bastie parmy les monts. C'est vne Chappelle fort belle & spatieuse, qui est toute seule à la campagne sur la plaine d'vne petite montagne. Elle est fort visitée des lieux circonuoisins pour les graces qu'on y reçoit, spécialement les personnes penitentes, ou affligées : C'est peut-estre la cause pourquoy la tres-sainte Vierge veut que cette sainte Chappelle soit toujours ouuerte, tant le iour que la nuit: On l'a voulu fermer souuentefois, mais le lendemain on trouue les portes par terre.

Il y a aussi plusieurs endroits remarquables dans l'Archidiaconé de Pontieu, où sont des images miraculeuses de la tres-sainte Mere de Dieu, comme à Mouffieres, à Bray, à Canchy, & en d'autres lieux: car depuis le temps qu'elle eut pris possession de la premiere ville de Pontieu, qui est Abbeuille, par le moyen de la premiere Eglise qui fut dédiée à son honneur, la deuotion des fideles enuers elle s'estendit par tout le pays, & ont toujours gardé ses images, dans les Eglises, à l'entrée de la ville, aux carrefours, dans les ruës, dans les maisons particulieres, dans les chambres, & dans les cabinets, comme le refuge de tous en toutes occasions. I'attribüé à vne particuliere benediction sur Abbeuille & es enuirs, que l'usage des images de la tres-sainte Vierge est si commun, qu'il n'y a si petit hameau, où l'on ne voye quelque marque de cette deuotion enuers la grande Reine du Ciel & de la terre.

Aussi est-elle grandement aymable: car quand l'esprit humain donneroit liberté à ses souhairs de chercher vn objet d'amour, si parfait qu'il pourroit desirer en vne pure creature, toute cette perfection se trouuera dans la Vierge, avec vne eminence si excellente, qu'elle estonne, & estonnera tous les siecles. Les meilleurs esprits du monde, & les plus grands Saints, sont tellement affectionnez à l'aymer, que le plus grand regret qu'ils ayent, c'est de l'affectionner trop peu: ô qui auroit

l'esprit éclairé de Dieu pour penetrer les biens, les delices, les grandeurs, les tresors, & les merueilles qu'il a mises dans la Vierge ! ô qui auroit l'intime sentiment des saintes ames enuers cette Dame incomparable, par les mains de qui passent toutes les faueurs que nous receuons du Ciel ! Viuons en esperance que nous aurons vne eternité interminable, où nostre pauvre cœur s'espanouïra, & se liquefiera dans ces douces affections de recognoissance, de ioye, d'amour, de remercimens, & de benedictions enuers la tres-aymable Vierge M A R I E.

Pour moy, sainte Vierge, si i'auois autant de vies qu'il y a de grains de sable en tout l'vniuers, & autant de moyens de vous aymer, honorer, & seruir, qu'en ont eu toutes les creatures ensemble, ie les voudrois employer tous pour vous, afin de contenter le grand desir de mon cœur, qui vit en l'esperance de vous voir, & vous aymer à iamais. Amen.